

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXVIII No. 5
Marso 7, 2007
www.philippinerevolution.net

Editorial

Hugot nga batuan ang mga pasista nga opensiba sang rehimeng Arroyo

Pilit nga ginatago ni Arroyo kag sang iya mga kriminal nga tinawo ang ila duguon nga kamot sa atubang sang malaparan nga pagkunderar sa sulod kag guwa sang pungsod sa mga ekstrahudisyal nga pagpamatay kag pagkuot sa mga aktibista kag iban pa nga nagabato sa iya rehimen. Sa pihak sini, samtang ginapanginwala sang militar nga sila ang ara sa likod sang pagpamatay, padayon naman nila ginahatagan-rason ang mga atake sa mga progresibo nga pwersa sa paliwat-liwat nga pagsiling nga sila mga “komunista” kag “kaaway sang estado.”

Labi pa gid subong nga ginapasasan ang pasistang nga pagpamigos kag paglatag sang pasista nga makinarya sang estado. Tuyo ni Arroyo nga tanan-nga-bahin nga lutuson ang mga demokratiko kag progresibong pwersa, tapnaon ang mga pagpamatuk kag papason ang tanan nga nagahangkat sa iya kagamhanan.


Sugod nga mabutang sa poder ang bogus, garuk kag mapiguson

nga rehimen, ginlarga na sini ang “todo-todo nga gera” batuk sa mga rebolusyonaryo kag progresibong pwersa. Ginlunsar sini sadtong 2001 ang Oplan Bantay Laya (OBL), isa ka plano nga “counter-insurgency” nga ginatampukan sang paglagas kag pagpatay sa mga lider kag myembro sang ligal nga demokratikong kahub-

lagan kag mga ginasuspetsahan nga nagasuporta sa rebolusyon. Sa atubang sang padayon gihapon nga pagbaskog sang rebolusyonaryong kahublagan kag pagpamatuk sa rehimen, labi sini nga ginpabangis ang bag-o nga bersyon sang OBL kag ginpasingki ang kampanya sang pangpulitika nga pagpamatay.

Ginkastigo sang Alston Mission ang rehimeng Arroyo sa pagbansag sini nga “kaaway sang estado” ang mga ligal nga progresibong pwersa, kag ginaangot ini sa nagakatabo nga pagpamatay sa mga aktibista. Sa pihak sini, padayon si Arroyo kag iya mga upisyal sa ila pagpangbansag.

Ang mga armadong tinawo sang AFP kag PNP ginpaidal sa pang-ideolohiya kag pangpulitika nga indoktrinasyon nga ginahimo sang mga puno nga pasista kag maestro nga kleriko-pasista sang Malacañang kag AFP. Ginadukdok sa utok sang mga suldado kag pulis nga wala sang kinalain ang mga armadong rebolusyonaryo kag mga di armadong ak-



**Mga tampok
sa isyu nga ini...**

**AFP ang ara sa likod
sg pagpamatay—Melo,
Alston**
PAHINA 5

**Mga kadalag-an sg
kahublagang
kababaihan**
PAHINA 8

**Ituhaw kag hilwayon
si Leo Velasco**
PAHINA 10

tibista, kag sa sini lunsay sila target sang ila mga armado nga bira. Malaut pa, bangud indi malutos sang mga armadong pwersa sang estado ang mga armado nga rebolusyonaryong pwersa, ang pangunahong target sang ila pagpamatay kag pasistang atake amo ang ginasuspetsahan nga nagasuporta sa armadong paghimakas kag ang mga nagahulag sa ligal nga patag kag parlamentaryo.

Kaangot kag kadungan sini, ginapasasan sang rehimeng Arroyo ang nagkalain-lain nga "ligal nga opensiba" agud direkta nga samaran, intrigahon kag pahugon ang mga hayag kag ligal nga progresibong partido kag organisasyon kag dingutan sila sang lugar kag kahigayunan nga epektibong makapasakup sa ligal kag parlamentaryo nga patag sang paghimakas. Kaangot sini ang wala untat nga paglatag sang mga pasistang layi kag pagpalala sa mga mapiguson nga pamaagi sang pagginahum.

Sa ila "ligal nga opensiba," pililit nga ginaangot sang pasistang rehimeng Arroyo kag sang AFP ang mga progresibong pwersa sa rebolusyonaryo nga armadong kahublagan agud hatagan-rason kag ila-

tag ang mga kundisyon para sila himuon nga target sang pasistang pag-atake, pagpanglupig kag pagpamatay.

Lakip man sa mga "ligal nga opensiba" ang "*calibrated preemptive response*," ang polisiya nga *no permit, no rally*, ang liwat nga pagbuhi sa Batas Pambansa 880 sang pasista nga diktaduryang Marcos, ang EO 464 kag ginbaylo diri ang Memorandum Circular 108, ang National ID System, ang malalayit militar nga Presidential Proclamation 1017 kag kadungan sini nga mga General Order. Tuyo man tani ni Arroyo nga ipanaog ang layi militar sadtong Pebrero 2006 pero gin-atras niya ini bangud sa kawad-on sang suporta. Napasar kag napirmahan na sining Marso 6 ang "layi kontra-terorismo" nga pormal nga nagahatag sang ligal nga basbas sa nagkalain-lain nga paagi sang paglapak sa tawhanong-kinamatarung kag kahilwayan sibil. Sa kamatuoran, halos kagamhanan militar na ang kaundan sini.


Solo na lamang ang pagbag-o sa konstitusyon ("cha-cha") ang kinahanglan ni Arroyo agud lubos nga mainstitusyunalisa ang mga polisiya nga pasista kag maki-im-

peryalista. Lauman nga igaratsada ini ni Arroyo pagkatapos sang eleksyon sa Mayo.

Subong nga nagahilapit ang eleksyon, paspas nga ginapasingki sang Malacañang ang "ligal nga opensiba" sa mga progresibong partido. Pdayon nga ginainitan ang mga ini ni National Security Adviser Norberto Gonzalez, ginapasi-bangdan nga mga "prente sang mga komunista" kag wala untat sa pagpang-ipit. Luwas sa armado nga rebolusyonaryong kahublagan, ginabilang sang rehimeng Arroyo nga isa sa pinakadaku nga sablag sa padayon nga paghari sini ang mga progresibong partido pareho sang Bayan Muna, Anakpawis kag Gabriela Women's Party. Indi makakas ang mga ini sa pagpanguna sa mga eleksyon para sa *party-list* sa Kongreso kag nagaserbi sila nga maligon kag epektibong haligi sang mga anti-Arroyo nga pwersa indi lamang sa Kongreso kundi pati sa parlamento sang kalye.

Ang ginapasanyog kag paglapad sang mga ekstrahudisyal nga pagpamatay, "ligal nga opensiba" kag iban pa nga pasistang pagpang-atake sang rehimen kag mga gaway sini indi patimaan sang matuod nga kusog. Sa kamatuoran, lunsay patiman-an ang mga ini sang pagkalutos kag desperasyon sang nagaharing rehimen sa atubang sang tuman kabaskog kag lapnagon nga kaakig kag pagbato sang pumuluyo.

Kinahanglan mabaskog kag wala untat nga batuan sang rebolusyonaryong kahublagan, sang mga patriyotiko kag demokratikong partido kag organisasyon kag sang bilog nga pumuluyo ang mga pasistang opensiba sang nagaharing rehimen. Kinahanglan pursigido nga batuan ang rehimen tubtub sa dalayon nga mapukan kag masilutan si Arroyo kag ang pangunahon niya nga mga kahimbon kag tagapatuman sang mga pasista kag terorista nga krimen. **AB**

<div data-bbox="142 1304 475 1407">  </div> <div data-bbox="134 1404 483 1432"> <p>Tuig XXXVIII No. 5 Marso 7, 2007</p> </div> <div data-bbox="116 1451 498 1537"> <p>Ang <i>Ang Bayan</i> ginabantala sa lengwahe nga Pilipino, Bisaya, Iloko, Hiligaynon, Waray kag Ingles.</p> </div> <div data-bbox="116 1537 498 1621"> <p>Mahimo ini i-download halin sa <i>Philippine Revolution Web Central</i> nga makit-an sa:</p> </div> <div data-bbox="178 1621 461 1650"> <p>www.philippinerevolution.org</p> </div> <div data-bbox="116 1650 498 1822"> <p>Nagabaton ang <i>Ang Bayan</i> sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan.</p> </div> <div data-bbox="142 1822 477 1879"> <p>Malab-ot kami paagi sa e-mail sa: angbayan@yahoo.com</p> </div>	<div data-bbox="545 1295 712 1333"> <h2>Kaundan</h2> </div> <div data-bbox="545 1344 1006 1400"> <p>Editorial: Hugot nga batuan ang pasistang opensiba ni Arroyo 1</p> </div> <div data-bbox="545 1404 1006 1461"> <p>Malacañang, AFP, determinado nga sipaon ang mga progresibong partido 3</p> </div> <div data-bbox="545 1465 1006 1522"> <p>AFP ang ara sa likod sang pagpamatay 5</p> </div> <div data-bbox="545 1526 1006 1583"> <p>Sabat sang mga biktima sa atake sang Melo Commission 7</p> </div> <div data-bbox="545 1587 1006 1644"> <p>Kadalag-an sang kababaihan 8</p> </div> <div data-bbox="545 1648 1006 1705"> <p>Pagpanghalit sang pasista nga estado</p> </div> <div data-bbox="545 1709 1006 1766"> <p>Kadre sang Partido sa Leyte, ginpatay 9</p> </div> <div data-bbox="545 1770 1006 1827"> <p>Ituhaw kag hilwayon si Leo Velasco 10</p> </div> <div data-bbox="545 1831 1006 1887"> <p>Ka Bel, nakahunong gihapon 11</p> </div> <div data-bbox="545 1892 1006 1948"> <p>Mangingisda sa Bohol, ginainitan sang mga pulis 11</p> </div> <div data-bbox="545 1953 1006 2009"> <p>Mga sibilyang Moro, biktima sang kalakasan sang AFP 11</p> </div> <div data-bbox="545 2013 1006 2070"> <p>Madinalag-on sang opensiba nga BHB 12</p> </div> <div data-bbox="545 2074 1006 2100"> <p>Balita 13</p> </div>	<div data-bbox="266 1896 863 1953"> <p>Ang <i>Ang Bayan</i> ginabantala duha ka beses kada bulan sang Komite Sentral sang Partido Komunista sang Pilipinas</p> </div>
---	--	---

Malacañang, AFP, determinado nga sipaon ang mga progresibong partido sa Kongreso

Ginagamit sang rehimeng US-Arroyo ang tanan nga ligal kag ekstraligal nga paa-gi agud mabalabagan ang liwat nga pagdaog sang mga progresibong partido sa maabot nga eleksyon kag dalayon nga masara sa ila ang makipot na nga patag sang ligal kag parlamentaryo nga paghimakas.

Tuman nga nagapangulba ang rehimen sa labi pa nga magalapad ang naabot nga suporta sang mga progresibong partido kag magadamu ang tiglawas nila sa Kongreso. Sobra ang kakulba ni Arroyo nga mangin labi nga epektibong pwersa ang mga ini sa pagpakigbato sang pumuluyo kag sa kahublagan para patalsikon siya sa poder.

Hugot kag malaparan ang koordinasyon sa tanan nga lebel sang AFP kag PNP agud siguruhon ang pagpatuman sa mga plano sang rehimeng US-Arroyo batuk sa mga progresibong partido. Indi na ini bag-o, kon usisaon. Pero subong, baraghal sini nga ginagamit ang tanan nga yunit sang AFP kag PNP. Subong ginpatuman sini ang plano nga unod sang mga dokumento nga "Special SOT Project: Counter Party-list at the Barangay Council (12 months implementation)" kag "CPP-NPA-NDF Party list Operations for 2004 Elections."

AFP kontra Bayan Muna kag ibpa

Todo-todo subong ang pagpang-ipit sang militar sa mga progresibong partido pareho sang Bayan Muna, Anakpawis, Gabriela Women's Party kag Kabataan Party. Nakakonsentrar ang mga operasyon sang AFP sa 305 syudad kag sentrong banwa. Lakip sa ila operasyon ang pag-aresto sa mga lider kag organisador sang mga progresibong partido nga ginapagguwa nila nga mga "kadre sang PKP."

Ginadumilian nila ang mga ta-

wo nga magsunod sa mga rali kag protesta nga ginalunsar sang mga progresibong grupo. Luwas sa mga ini, nagalunsar ang AFP sang sarisaring operasyon agud sablagan ang pagkampanya sang mga progresibong partido kag kandidato, lakip ang pagpamahug sa pumuluyo, pagpang-ipit sa mga nagakampanya kag padayon sa kampanya sang pagpamatay. Baliskad sa kuno pagka-nyutral sang militar sa eleksyon, hayag nga ginasaad sa mga dokumento nga aktibo nga paentrahon ang mga pwersa sang AFP sa "patag sang inaway pangpulitika" batuk sa ginabansagan nila nga mga "kadampig sang PKP kag BHB."

Nagahimo man sang "counter-organizing" ukon pagtukod sang mga paltik nga grupo nga pangbunggo sa mga progresibong partido. Tinguhaon nila nga gamuhon ang isip sang pumuluyo angot sa mga isyu nga dala sang mga demokratikong organisasyon gamit ang mga kontra-rebolusyonaryo kag anti-komunista nga partido kag grupo. Direkta nga ginsaad sa mga dokumento sang AFP nga dapat ikampanya sang mga pwersang militar ang mga "abyan" nga partido pareho sang Akbayan, ABA-AKO, COOP-NATCO, Akapin, TUCP kag iban pa. Luwas sa mga ini, gina-



kampanya man sang AFP ang mga masupog nga pasista kag antikomunista nga ANAD kag AKSA.

Pagagamiton man ang mga tinawo sang AFP agud mangampanya kag dagsa nga magboto para sa ila mga pinili nga partido kag kandidato. Madamuan nga ginparehistro ang mga suldado sa mga presinto sa mga baryo nga sakup nila sa kaumhan kag kasyudaran kon sa diin mabaskog ang mga progresibong partido.

Militarisasyon sa mga balwarte sang mga kaaway sa pulitika

Halin Nobyembre 2006, masobra 250 suldado ang gindeploy sang AFP sa 27 barangay sang mga mamumugon kag imol sa National Capital Region (NCR) kon sa diin ginasisagahum nga mabaskog ang mga progresibong partido. Ang mga pwersa sang AFP nga nalakip sa mga ginhanas sa Civil-Military Operations ginapamunuan ni Lt. Col. Ricardo Visaya.

Suno kay Maj. Gen. Benjamin Dolorfino, pinuno sang AFP NCR Command, ginpakat nila ang mga yunit militar diri agud batuan ang mga progresibong partido kag organisasyon, pati na ang mga tagasakdag sang tawhanong-kinamatarung. Hayagan nga pasista ang gindeklarar nga katuyuan sang AFP nga tapnaon ang mga nagapalapnag sa mga komunidad nga "kultura sang rebelyon, pagbato sa gubyrno kag parlamento sang kalye."

Sa Metro Manila, nakadeploy na ang mga yunit militar sa mga barangay sang Parola, Isla Pting Bato kag Del Pan sa Tondo kag sa mga barangay sang Sta. Mesa sa Mayni-

la; sa mga barangay sang Commonwealth, Payatas kag Bagong Silang sa Quezon City; amo man sa madamu nga barangay sa Caloocan City. May mga report man nga nagapwesto ang mga yunit militar sa mga komunidad sang imol sa syudad sa Cebu, Davao kag iban pa nga pangunahon nga syudad.

Kadungan sa paglibot sang militar, nagalapnag man sa mga lugar nga ini ang pagpamahug sa pumuluho. Nagadamu man ang mga kaso sang iligal nga pagpang-aresto kag detensyon kag iban pa nga paglabag sa tawhanong-kinamatarung. Tampok ang kaso ni Roberto Corbes, isa ka katapu sang Bayan Muna (BM) nga gin-abangan sang mga suldao sadtong Pebrero 26 sa Payatas kag ginpaandaman nga partyon kon padayunon niya nga igakampanya ang BM. Makaligad ang tatlo ka adlaw, ginguba sang wala makilala nga mga lalaki ang pwertahan sang iya balay kag ginbato siya.

Nagahimo sang mga tsekpoynt sa Payatas kag nagapamalay-balay ang mga tim sang suldao sa mga balay sang mga katapu sang Kabataan Party. Tatlo ka pamatan-on na ang ginpatawag kag gin-imbestiga sa detatsment sang militar bahin sa ila mga aktibidad sa purok.

Sa mga barangay sa Negros, padayon nga ginaharas sang mga pwersang militar kag bandido nga RPA-ABB ang mga lider kag myembro sang BM, Anakpawis, Gabriela Women's Party kag Kabataan party.

Amo man sini ang ginahimo sang mga pwersa sang militar sa linibu-libo nga barangay sa kaumahan, labi na kon mabaskog ang rebolusyonaryong kahublagan kag ang mga progresibong partido kag organisasyon.

Taktika nga diskwalipikasyon

Nakasaad man sa nasambit nga mga dokumento sang AFP bilang isa ka mayor nga porma sang pag-

Kontra Daya, pagabantayan ang eleksyon

GINTUKOD sining Pebrero 23 ang Kontra Daya, isa ka grupo nga nagadeklarar nga magabantay batuk sa pagdinaya sa eleksyon subong nga Mayo. Nanguna sa pagtukod sang Kontra Daya amo si anay Vice President Teofisto Guingona. Ginalakipan ini sang mga tiglawas sang Ecumenical Bishops Forum, Computer Professionals Union, Concerned Artists of the Philippines, TxtPower, Doctors and Nurses for Clean and Credible Elections, Sinag, Bayan, UP Academic Employees Union, Agham kag Alliance of Concerned Teachers.

Suno sa Kontra Daya, may ikasarang ang rehimeng Arroyo nga maghimo sang malaparan nga pagdinaya sa Mayo bangud may kapot ini nga resorsa, kag may kasaysayan ini sang pagdinaya kag mabasog nga motibo para diri. Magabantay ang Kontra Daya batuk sa paggamit sang pondo kag resorsa sang guberno, sang pondo halin sa sugal kag mga iligal nga aktibidad kag sa paggamit sa AFP kag pulisya agud pasilabtan ang eleksyon.

AFP, Arroyo sa likod sang kandidatura ni Palparan

MAUKOD nga ginasuportahan nanday AFP Chief of Staff Gen. Hermogenes Esperon kag Presidential Legal Adviser Sergio Apostol ang deklarasyon ni anay Maj. Gen. Jovito Palparan nga magadalagan sa maabot nga eleksyon. Ginsiling ni Esperon nga magdaug tani si Palparan bilang kandidato sa sistemang *party-list*, kag mobilisahan niya ang mga suldao agud protektahan ang mga boto sang berdugo ni Arroyo. Ginkundenar naman ni Apostol ang mga magapamatuk sa pagdalagan ni Palparan nga siling niya "kwalipikado si Palparan" kag wala sang nagadumili sa iya.

Si Palparan posible magadalagan bilang nominado sang anti-komunista nga ANAD. Samtang, gin-anunsyo man sang isa pa ka pasista, si National Security Adviser Norberto Gonzales nga magakandidato siya sa pagkakongresista sang ikaduha nga distrito sang Bataan.

pang-ipit ang pagpasaka sang mga kaso sang diskwalipikasyon batuk sa mga progresibong partido.

Duha ka separado nga kaso para sa diskwalipikasyon ang napasaka na sa COMELEC batuk sa BM, Anakpawis kag Gabriela Women's Party. Duha nga nagapanabon nga bayaran nga testigo halin sa Nueva Ecija ang gingamit sang AFP agud itudlo sanday Bayan Muna Rep. Satur Ocampo kag Teddy Casiño, Anakpawis Rep. Rafael Mariano kag Gabriela Women's Party Rep. Liza Maza bilang utok kuno sa pagpatay sa ila mga bana. Padihot ini sang Inter-Agency Legal Action

Group na ginapamunuan ni National Security Adviser Norberto Gonzales kag Justice Secretary Raul Gonzalez agud mahigot sa amo nga mga asunto ang nasambit nga partido kag indi sila epektibo nga makapangampanya.

Ginmanduan man ni Arroyo ang bag-o niya nga nombar nga Presidential Legal Adviser nga si Sergio Apostol nga makumplot sa AFP sa pagpasaka sa COMELEC sang madamu pa nga kaso batuk sa mga progresibong partido agud makakas ang mga akreditasyon sang BM, Anakpawis kag Gabriela Women's Party. AB

Report nanday Melo kag Alston

Ang AFP ang ara sa likod sang serye sang ekstrahudisyal nga pagpamatay

Partido Komunista sang Pilipinas
Pebrero 28, 2007

Ginahatagan-igtalupangud sang Partido Komunista sang Pilipinas ang mga positibo nga punto sa report sang Melo Commission kag sa mga panugod nga resulta sang pagpangusisa sang Alston Mission sa serye sang ekstrahudisyal nga pagpamatay sa pungsod.

Ang duha ka separado nga report may magkatuhay sa dalum sang imbestigasyon, talom sang pag-analisa kag lebel sang kongklusyon, pero nagahiusa sa pagpamatuod nga nagakatabo ang tuma-lagsahon nga serye sang pangpulitika nga ekstrahudisyal nga pagpamatay nga nagatarget sa mga aktibista kag katapu sang mga progresibo kag demokratikong organisasyon kag sa kongklusyon ang mga pagpatay kahimuan mayormente sang mga elemento sang armadong pwersa sang estado. Sa pihak ini sang mga limitasyon—labi na sa bahin sang Melo Commission.

Pareho ang kongklusyon sang duha ka report nga ang mga pagpamatay gindukdok na sa paminsaron sang militar. Ginapamatud-an sang report sang Melo Commission nga "halos tanan nga mga biktima katapu sang mga grupong aktibista ukon indi gani myembro sang midya (nga ginpatay) sandig sa isa ka plano nga ginakumpas sang isa ka grupo ukon sektor nga may tuyo nga papason ang mga biktima." Ginhatagan atensyon sini ang pagbilang sang militar sa mga ligal nga pwersa nga maki-Wala bilang mga "kaaway sang estado" nga dapat "nyutralisahon."

Ang Alston Report naman mas madalum nga nag-analisa sa mga pungsodnon nga polisiya nga sa sandigan nagapahanugot sa mga pagpatay, lakip ang programa nga

"kontra-insureksyon" nga nagatarget sa mga ginadudahan nga baseng masa kag mga ligal nga istruktura nga maki-Wala kag nasakup sa kampa-nya sang militar agud samaron kag pahugon ang mga progresibong organisasyon. Siling ni Alston. Ang tanan nga ini ululupod nga magatapos sa ekstrahudisyal nga pagpamatay sa mga maki-Wala nga lider, katapu kag tagasuporta.

Lunsay man nga ginguba sang duha ka report ang ginapabugal sang rehimeng Arroyo kag sang pinakamataas nga upisyal sini sa militar kag seguridad nga ang nagakatabo nga mga ekstrahudisyal nga pagpamatay kabahin sang purgahan sa sulod sang rebolusyonaryong kahublagaan.

Wala ginpatihan sang Alston Report ang ginapangwakal sang AFP nga ang mga datos nga ginpresentar sang Karapatan, Bayan Muna kag iban pa nga organisasyon himu-himo kag produkto lamang sang propaganda sang mga "prente sang komunista" kag ang rason kuno sang pagdamu sang patyanay amo ang pagpamurga nga ginahimo sang PKP-BHB. Sa pihak nga bahin, gintumod sang report nga himu-himo kag disimpormasyon lamang ang ginasingling nga dokumento nga "Oplan Bushfire" nga suno sa AFP isa kuno nga internal nga



dokumento sang PKP nga nagapamatuod sa teorya nga "purgahan." Dugang pa, gintumod sang Melo Report ang ironya sang pagpamilit sang militar sa teorya nga "purgahan" kadungan sang pagsiling nga "kaaway sang estado" ang mga biktima. Labi nga nakahatag-kaathagan sa Melo Commission ang kama-tuoran nga si General Palparan mismo wala nagapati sa teorya nga "purgahan" kag duda pa gani sa mga report bahin diri. Gintumod man sang Melo Report nga ni isa sa mga biktima (nga sa paabot sang militar mga ahente sini) ukon mga pamilya ukon testigo nila amo ang indi makahatag sang proteksyon sang militar.

Kumparar sa Melo Commission, mas mataas ang kalidad sang report nga ginhimo sang Alston Mission. Ini sa pihak nga una nga pagduaw lamang sini sa pungsod, malip-ot lamang ang panahon nga naka-imbestigar ini, wala-tuo nga tuyo sang gubyerno nga limitahan ang hulag sini kag pagpakig-angot sa mga biktima kag organisasyon sang tawhanong-kinamatarung, luwas pa sa pagkontra sang gubyerno

kag militar sa presensya sini.

Nalabawan sini ang Melo Commission sa dalum sang pagpangusi-sa, maayo nga pagpakigrelasyon nga naangkon sa mga himata sang mga biktima, mga saksi kag mga *human rights worker*, sa matuod nga pagsimpatiya sa mga ginahinun-anon, sa nahibal-an nga naangkon kag sa ginbunga sang katalum sang mga nahimo nga kongklusyon.

Base sa mga panugod nga kongklusyon sang Alston Mission bahin sa serye sang ekstrahudisyal nga pagpamatay sa Pilipinas, ginalauman nga mangin mas masunson kag kritikal ang pinal nga report sini. Ang serye sang ekstrahudisyal nga pagpamatay sa Pilipinas ginkagugmat kag ginkakulba sang husto sang Alston Mission, gani, luwas sa UNCHR, plano man sini nga isumiter ang pinal nga report sa International People's Court nga nakabase sa The Hague, The Netherlands.

Sa pihak nga bahin, sa umpisa pa lamang ginaatubang na sang Melo Commission ang mga sablag nga dulot sang nangin tuga sang Malacañang nga ang katuyuan amo nga takpan ang responsibilidad sang rehimeng Arroyo sa pagpamatay. Indi ini independyente, kapos sa pondo kag resorsa kag wala ini sang gahum nga *i-subpoena* ang mga akusado, protektahan ang mga testigo kag magpataw sang sentensya. Labaw sa tanan, wala sini makuha ang pagsalig sa mga himata sang mga biktima kag organisasyon sa tawhanong-kinamatarung kag sa kabilugan, mga testimonya sang militar ang ginabasehan sini. Sa amo pa man indi sini matago ang maathag nga kamatuoran nga ang militar ang may kahimuan sang mga pagpatay. Nampakpan ang militar sa ila mismo nga mga testimonya, dokumento, pahayag kag pagpangrasonan.

Ginasigahum sang Melo

Commission "ang isa ka lebel sang kapat-uran sa pagsiling nga labing posible nga kahimuan sang pila ka elemento sang militar, lakip si Gen. Jovito Palparan, ang pagpatay sa mga aktibista." Gindugang pa sang Melo Commission nga pila sa mga mas mataas kay Palparan "mahimo nga pasabton sa kapaslawan nila nga pungan, silutan kag kundenahon ang mga pagpatay sandig sa prinsipyo sang *command responsibility*." Amo man, nagkontento na ang report sa pagbasol sa mga indibidwal nga suldado kag upisyal. Ginsiling sini nga "ang mga pagpamatay pat-ud nga indi mabasol sa organisasyong militar mismo ukon sa estado, kundi sa mga indibidwal ukon grupo lamang nga nagahulag sandig sa ila kaugalingon nga interes." Hambal pa sini nga "mahimo kulang pa ini agud magkadto sa paghusgar ang mga ebidensya nga ginpresentar sa komisyon."

Si Arroyo mismo wala gindalahig sang duha ka report sa kabangdanan—nagalikaw ang Alston Mission nga makatuga sang diplomatiko nga problema, samtang ang Melo Commission naman todo-dayaw na kay Arroyo sa umpisa pa lang kag nagatinguha nga sagngon ang may kahimuan sini.

Sa amo pa man, lunsay gintumod sang duha ka report nga ang mga polisiya nga antagonistiko sa mga militanteng oposisyon kag aktibista—partikular ang polisiya sang pagpanamad sa mga progresibong organisasyon nga nagabansag sa ila bilang mga "kaaway sang estado" kag nagatabog sa ila pagguwa sa ligal nga patag sang pag-

himakas—amo ang pinakabalayon sang mga pagpamatay.

Sa kamatuoran, si Arroyo ang utok kag pangkabilugan tagakumpas sang mga pasistang atake nga ini. Siya ang pinakamataas nga indibidwal nga responsable sa mga brutal kag kontra-pumuluyo nga Internal Security Operation Plan Bantay Laya nga ara sa ikaduha nga halintang na subong. Ang Oplan Bantay Laya ang pangunahon kag partikular nagatarget sa mga ginasuspetsahan nga masang tagasuporta sang rebolusyonaryong hublag kag sang hayag nga ligal nga demokratikong hublag nga ginapilit nila nga kabahin sang "imprastrakturang pangpulitika" sang armado nga rebolusyonaryong kahublagan. Si Arroyo mismo ang aktibo nga imbolbado sa mga anti-komunista nga pagpanglagas sa ligal nga Wala paagi sa pagbansag sa Bayan, Karapatan kag mga kapareho nga demokratikong organisasyon sini bilang mga "organisasyon nga prente sang komunista" kag "kaaway sang estado." Kon amo ginamarkahan na sila bilang mga target sang pisikal kag pangpulitika nga pagpamatay. Ginapabwelo niya ang iya kleriko-pasista nga National Security Adviser nga si Norberto Gonzales kag iban pa nga mataas nga upisyal sa militar kag seguridad sa paghimo sang anti-komunista nga pagpanglagas. Paliwat-liwat kag baraghal niya nga ginadayaw si Palparan kag ang iya wala pili kag mapintas nga atake batuk sa mga rebolusyonaryo nga baseng masa bilang modelo sa "kontra-insureksyon" nga dapat sundon sang bilog AFP.

Sa pihak sang pagguwa sang duha ka report nga nakasamad sa rehimen, pilit pa gihapon nga ginaabswelto ni Arroyo ang iya armadong pwersa kag ginapasa ang basol sa rebolusyonaryong hublag. Kriminal kag wala gihapon sang hawid ang rehimeng



Arroyo kag ang AFP sa binuang nila nga kampanya batuk sa hayag kag ligal nga mga progresibong organisasyon. Nagapahulag gihapon sila sang mga *death squad* agud likidahon ang mga ginabilang nila nga kaaway kag ang amo nga piskal nga kalakasan ginatukuran nila sang "ligal nga opensiba" agud sablagan ukon pagamayon ang epektibo nga partisipasyon sang mga "organisasyon nga prente sang komunista" kag "kaaway sang estado" sa ligal nga patag.

Direkta nga pasabton sang PKP si Gloria Arroyo sa kampanya sang ekstrahudisyal nga pagpamatay batuk sa mga progresibong organisasyon kag partido. Iya nga responsibilidad indi lamang bilang *commander-in-chief* sang AFP, kundi bilang pinakamataas nga awtoridad sa likod sang Oplan Bantay Laya kag bilang puno nga ehekutibo kag superyor sang Cabinet Oversight Committee on Internal Security (COCIS) nga amo ang nagaplano, nagadiriher kag nagakoordinar sang duha ka kampanya sang piskal nga eliminasyon (ukon ekstrahudisyal nga pagpamatay) kag pangpulitika nga eliminasyon (ukon "opensibang ligal") batuk sa patriyotiko kag demokratikong hublag.

Sa pinakaulihi niya nga masupog nga maniobra batuk sa Wala, ginmanduan ni Arroyo ang iya *legal adviser* nga maghimbunanay sa AFP kag sa Comelec agud himuan sang paagi ang posible nga diskwalipikasyon sang Bayan Muna kag iban pa nga progresibong partido agud sa sini mapiang ang partisipasyon sang mga organisasyon nga ini sa ligal kag parlamentaryo nga patag.

Kag sa desperado nga tuyo nga samaran ang report nanday Alston kag Melo, ginmanduan ni Arroyo ang pinakamataas nga upisyal sa Kabinete, seguridad kag militar nga ibale-wala ang mga grupo nga nagimbestiga. Espesyal ang kapintas

Sabat sang mga biktima sa atake sang Melo Commission

Indi pagbasulon ninyo ang mga biktima!" Amo ang sabat sang Bagong Alyansang Makabayan (Bayan) sa pagkastigo sang Melo Commission sa mga biktima sang pagpamatay, sa ila mga pamilya kag abyan bangud sa pagbalibad nila nga magpasakup sa ginahimo sini nga imbestigasyon. Suno kay Renato Reyes, pangkabilugan nga sekretaryo sang Bayan, indi ang kakulangan sang partisipasyon sang mga indibidwal kag organisasyon sini sa imbestigasyon ang kabangdanan kon ngaa maluya kag indi mabaton-baton ang ginpagguwa nga report sang komisyon.

Ang matuod nga rason, siling niya, amo ang makitid kag kwestyunable nga balayon nga gingamit sang komisyon sa pagtumod sa mga ugat sang ekstrahudisyal nga pagpamatay. Hungod sini nga ginbalewala ang mga nagaluntad kag ginapaluntad nga mga pasistang programa sang rehimen, ilabi na ang Oplan Bantay Laya nga nagatarget sa mga ginadudahan nga baseng masa sang rebolusyonaryong kahublagan.

Suno naman kay Prof. Philip Alston, *special rapporteur* sang United Nations, nahangpan niya ang pagbalibad sang mga pamilya sang biktima kag ila mga tagasuportga nga mag-atubang sa komisyon. Wala siling niya sang ginhimo nga dugang nga pagtinguha agud makuha ang ila mga testimonya. Gin-insulto pa sini ang mga pamilya sa pagpamilit nga magpaidalum sila sa "proteksyon" sang mga armadong tinawo sang rehimen nga mismo ginadudahan nga sa likod sang pagpamatay.

Samtang, sa katuyuan nga pagguwaon nga seryoso ini sa pagresolbar sa mga kaso sang pagpamatay, ginaanunsyo sang rehimeng Arroyo sining Marso 5 ang pagtukod sang 99 nga espesyal nga korte nga magabista kuno sa mga kaso sang ekstrahudisyal nga pagpatay. Ginhangkat sang Bayan ang rehimeng Arroyo nga pasakaan sang kaso si Gen. Jovito Palparan, nga gintumod sang Melo Commission nga isa sa mga ara sa likod sang pagpamatay.

AB

ni Justice Sec. Raul Gonzalez nga nagsiling "daan na nga nahuman ang panan-awan" ni Alston sang mag-abot siya sa pungsod kag siya kuno "*na-brainwash* na sang Wala." Ginsiling ni AFP Chief of Staff Gen. Hermogenes Esperon nga "Kon may ara nga nagapakuno-kuno, si Alston ina." Ginpasibangdan naman ni Palparan ang Melo Commission nga kuno ini "nasuhot sang kaaway."

Sa pihak sang pagpang-ipit ni Gloria Arroyo nga wala siya sang ihibalo sa ekstrahudisyal nga pagpamatay sa mga aktibista kag sa mga pagtinguha niya nga takpan

ang ebidensya, maathag ang husga. Ang mga kamot nagatulo sang dugo sang tuman kadamu nga biktima sang ekstrahudisyal nga pagpamatay sa pungsod. Nagalanog ang singgit para sa hustisya. Ginainsister sang pumuluyong Pilipino nga nagakadapat pasabton si Arroyo kag ang iya mga idu-ido sa ila papel sa mga pagpamatay, sa wala'y huya nga pagtinguha nga takpan ang makasiligni nga mga krimen nga ini kag sa nagapadayon nga mga masaker, pagkuot kag brutal nga pagtapna sa paghimakas sang banwa para sa pungsodnon kag kahilwayan sosyal.

AB

Ihugyaw ang mga kadalag-an sang kahublagan sang kababaihan nga Pilipino!

Ginasaulog sang kababaihan nga Pilipino subong nga tuig ang mga signipikanteng kadalag-an sa pagpasulong sang ila kaayuhan kag interes. Ginalauman nga linibu-libo nga kababaihan ang magadagsa sa kalye sa nagkalain-lain nga bahin sang pungsod indi lamang agud patampukon ang mga kadalag-an nga ini kundi para palig-on ang ila determinasyon nga padayon nga maghimakas sa atubang sang wala untat nga kampanya sang pagpamigos sang rehimeng US-Arroyo.

Suno sa tagapamaba sang Makibaka (Makabayang Kilusan ng Bagong Kababaihan) nga si Ka Aleta Alvino, nagakadapat lamang nga salugon ang mga kadalag-an sang kahublagan sang kababaihan batuk sa maki-imperyalista, mapanghimulos, mapanglupig kag kontra-pumuluyo nga mga polisiya sang rehimeng US-Arroyo. Ginhatagan tum-ok ni Ka Aleta ang madamu nga pagpasakup sang kababaihan sa pagbato sa mga maniobra sang rehimeng Arroyo pareho sang pagduso sang Cha-cha (*charter change*), pagbasura sa kasong *impeachment* batuk kay Arroyo kag iban pa.

Ginapakita man sang kahublagan sang kababaihan ang kalig-on kag determinasyon sa atubang sang wala kapares nga pag-antos kag sakripisyo nga dulot sa ila kag ila mga pamilya sang todo-todo nga gera, pasistang pagpamatay kag terorismo sang rehimeng US-Arroyo.

Kadungan man, ginkastigo ni Ka Aleta ang wala kaluoy nga pasistang pagpanglupig sang rehimeng Arroyo sa kababaihan. Umpisa 2001, nagabot na sa 83 ang ginpatay nga ka-

babaihan, nga kadam-an halin sa mga organisasyon. Duha ka pulo ang ginpatay sadtong nagligad nga tuig lamang. Singkuenta'y kwatro sa mga ginpatay mga bata. Samtang, 33 sa 150 *desaparecido* ukon mga ginkuot kag nadula pa amo ang mga babae. Dugang pa sa mga ini ang ginatusgatos nga iloy na nadulaan sang mga anak, mga nabalo nga asawa, kag mga nadulaan sang amay kag utod.

Lakip ang mga kababaihan sa mga nagapanguna sa organisasyon sang mga pamilya sang mga biktima nga determinado nga sukton ang rehimeng US-Arroyo sa mga krimen sini. Ginapakita nila ang kaisog sa pagpangapin sa tawhanong-kinamatarung, sa pagbuyagyag sa mga krimen sang rehimen kag pagsinggit para sa katarungan.

Wala sang ginapili ang rehimeng Arroyo sa pagpamigos sini sa kababaihan kag pumuluyong Pilipino, siling ni Ka Aleta. Ginhatagan-tum-ok niya nga pati ang napilian nga tiglawas sang kababaihan sa Kongreso nag-agi sa grabe nga pagpang-ipit. Sadtong Pebrero 2006, ginpasakaan sang himu-himo nga kasong rebelyon si Gabriela Rep. Liza Maza, upod ang lima pa nga tiglawas sang mga progresibong partido. Lakip si Maza sa napilitan nga mag-estar sa Batasan Complex sang sobra duha ka bulan sa atubang sang pamahug nga arestuhon sila. Sa pihak sini, wala napaatras ang mga tiglawas sang pumuluyo. Ginasaluduhan ni Ka Aleta ang ginhimo nga pagbale-wala ni Maza sa dikta sang Malacañang nga magpabilin lamang sa Batasan Complex sang magbyahe siya pakadto sa Senado agud saksihan ang pagpirma sa isa sa mga ginapakigbato niya nga



hagna didto. Wala man magdugay, napilitan ang estado nga hilwayon ang lima sa ila.

Ginakabig man ni Ka Aleta nga daku nga kadalag-an sang kababaihan nga Pilipino ang paghusgar sang lokal nga korte sa suldado nga Amerikano nga naglugos sa Pilipina nga si "Nicole." Gin-updan sang mga organisasyon sang kababaihan si Nicole sa iya pagpakigbato para sa hustisya, ginpangapinan siya sa pagpang-insulto sa iya pagkatawo kag sa mga maniobra sang rehimeng Arroyo agud samaran kon indi man suhulan siya kag ang iya pamilya. Sa bulig sang mga nagasuporta sa iya, ginpakita ni Nicole ang lubos nga kalig-on. Nag-agum si Nicole sang kadalag-an nga ginkalipay indi lamang sang mga kababaihan kundi sang bilog nga pumuluyo. Determinado si Nicole, ang iya pamilya, mga abugado kag tagasuporta nga padayunon ang away makaligad magmaniobra ang US kag ang rehimen nga bale-walaon ang husgar sang korte.

Ang pang-umpisa nga kadalag-an ni Nicole panugod lamang sang mas daku pa nga hangkat—para sa tanan nga kababaihan kag pumuluyo—nga pamatukan ang Visiting Forces Agree-

Kadre sang Partido, ginsalbeyds sa Leyte

Tampok sa pinakaulihi nga mga kaso sang makasiligni nga pagpatay nga nakalap sang *AB* amo ang pagsalbeyds sang militar sa isa ka nadakup nga kadre sang Partido sa Leyte. Isa man ka lider sang Anakpawis sa Davao del Sur ang ginpatay bilang bahin sang nagapasingki nga pagpang-ipit sa mga progresibong partido samtang nagahilapit ang eleksyon.

Marso 2. Ginpatay sang duha ka nakamotorsiklo nga berdugo sa Digos, Davao del Sur si Renato Torrecampo Pacaide, 53, *coordinator* sang Anakpawis sa prubinsya kag pangkabilugan nga sekretaryo sang Nagkahiusang Mag-uuma sa Davao del Sur. Siya ang ika-79 nga biktima sang pagpamatay sa Southern Mindanao halin sadtong 2001.

Pebrero 25. Ginpatay sang mga elemento sang 19th IB nga nakabase sa Kananga, Leyte si Antonio Ramos, sekretaryo sang prenteng gerilya sa Northern Leyte matapos arestuhon siya sa isa ka tsekpoynt sa Barangay Olutan, Jaro, Leyte. Lulan sa isa ka trak sang militar pagakadto sa Kananga si Ramos sang siya luthangon sang mga nag-aresto nga suldado. Suno sa mga himuhimo nga istorya sang AFP, nagtuyo kuno nga malagyo si Ramos gani ginluthang siya.


Pebrero 20. Sa Barangay Bunal, Salay, Misamis Oriental, gintuyo nga patyon sang duha ka berdugo si Menoncio "Bebe" Panhay, 62, myembro sang Misamis Oriental Farmers Association (MOFA), kagdampig nga organisasyon sang Kilusang Magbubukid ng Pilipinas.

Nagpakuno-kuno nga mabakal

sang manok ang mga pasistang kriminal antes nila luthangon si Panhay. Napilasan siya sa tiil kag nakadalagan sa ila balay. Ginlagas siya sang mga berdugo pero ginbatuan sila sang asawa ni Panhay nga may dala nga binangon. Nalagyo ang mga kriminal sa direksyon sang kampo sang militar. Nagatago subong si Panhay bangud sa padayon nga pamahug sa iya kabuhi.

Pebrero 19. Ginpatay sang mga pasistang berdugo si Hernani Pastolero, 64, brodkaster sang DXCM (University of Mindanao Broadcasting Network) kag presente nga editor sang pahayagan nga *Lightning Courier*. Si Pastolero, nga ginpatay sa iya balay sa Sultan Kudarat, Shariff Kabunsuan bandang alas-6:30 sang aga amo ang lider sang isa ka asosasyon sang mga residente nga nagabato para makadto sa ila ang duta nga ginaestaran. Duha ka bala sang kal. 45 ang nagigo sa likod sang ulo ni Pastolero kag iya gilayon nga ginkamatay.

Pebrero 4. Ginsundan sang mga



elemento sang Internal Security Unit (ISU) si Ricky Palencia, tagapangulo sang COURAGE-Eastern Visayas umpisa nga maghalin siya sa Leyte Metropolitan Waterworks Department (LMWD) Motorpool sa Nulatula, Tacloban City tubtub makabot siya sa mayor nga upisina. Isa sa mga elemento nga nagasunod kay Palencia kag nadakup kilala sang mga saksi bilang *triggerman* sa pagsalbeyds sadtong Oktubre 15, 2004 kay Sammy Bandilla, lider sang unyon sang LMWD. Si Palencia ara sa *hitlist* sang militar.

Enero 26. Ginharas sang mga elemento sang Philippine Army kag bandido nga Revolutionary Proletarian Army-Alex Bongcayao Brigade ang mga lider kag myembro sang Bayan Muna, Anakpawis, Gabriela Women's Party kag Kabataan Party sa nagkalain-lain nga lugar sa Negros Occidental. Sa Barangay Orong kag Barangay Hilamon, Kabankalan City, nagsona ang mga elemento sang 61st IB agud pahugon ang mga residente nga magsuporta sa mga progresibong partido. Sa Himamaylan City kag banwa sang Hinobaan, ginadumilian ang mga residente nga magpasakup kag magboto sa nasambit nga mga partido. Ginpahug man sang isa ka Sergeant Abay sang 61st IB si Archilles Yonson, organisador sang militanteng National Federation of Sugar Workers (NFSW).

AB

"Thugyaw...", halin pahina 8

ment, ang pagpasilabot sang militar sang US sa pungsod kag ang banggian nga relasyon sa tunga sang imperyalismong US kag Pilipinas.

Ang mga ini amo ang pila lamang sa tampok nga mga kadalag-

an nga nalab-ot sang kahublagang kababaihan sining nagligad nga tugig, siling ni Ka Aleta. Pamatuod ang mga ini sang kalig-on kag militansya sang kababaihan sa pagpasulong sang interes kag kaayuhan sang pumuluyo. Bangud diri, indi na basta-basta mapahigad ang

mga reklamo kag panindugan sang kababaihan sa mga halambalanon lokal kag nasyunal. Ginasalaming sang ila naabot nga kusog ang nagalapad nga papel sang kababaihan, labi na sang kababaihang anakbalhas, sa pulitika, kultura kag ekonomya sang pungsod.

AB



Ituhaw kag hilwayon si Leo Velasco!

Mabaskog nga ginakundenar sang Partido Komunista sang Pilipinas (PKP) kag sang National Democratic Front of the Philippines (NDFP) ang iligal kag matalaw nga pagkuot kay Leo Velasco sang mga pwersa pangseguridad sang pasista nga rehimeng US-Arroyo. Ginainsister sang PKP kag NDFP sa Gubyerno sang Republika sang Pilipinas (GRP) nga gilayon ituhaw kag hilwayon si Velasco, isa kag katapu sang Komite Sentral sang PKP kag konsultant sang NDFP sa negosasyon pangkalinungan.

Suno sa mga saksi, ginkuot sang tatlo ka armadong lalaki si Velasco bandang alas-10:30 sang aga sadtong Pebrero 19 sa kanto sang Yacapin kag Aguinaldo Street sa Cagayan de Oro City, kag pwersahan nga ginsakay sa isa ka L300 van nga may plaka nga LCV-513. Sang tuyo nga magtambag ang mga tawo sa palibot, ginpunggan sila sang mga nagkuot kag ginhambalan nga "indi magkabalaka" bangud mga tinawo sila sang gubyerno kag myembro sang Criminal Investigation and Detection Group (CIDG).

Bisan madamu nga nakasaksi kag nakapanugid bahin sa natabo, pilit gihapon nga ginapangin-wala sang militar kag pulisya ang pagkuot kay Velasco. Suno sa kumander sang 4th ID nga nakabase sa syudad, wala siya sang nahibal-an nahanungod sa insidente.

Ginainsister sang PKP kag sang NDFP sa rehimeng US-Arroyo nga dapat respetuhon ang mga kinamatarung ni Velasco sa idalum sang mga internasyunal nga makatawo nga layi kag mga pagsulundan sa gera, amo man sa idalum sang Joint Agreement on Safety and Immunity Guarantees (JASIG) sadtong 1995 kag sang Comprehensive Agreement on Respect for Human Rights and International Humanitarian Law (CAHRIHL) sadtong 1998.

Ang CAHRIHL kag JASIG amo

ang mga kasugtanan sa tunga sang NDFP kag GRP nga nagapabilin nga epektibo sa pihak sang suspensyon sang pormal nga sugilanon pangkalinungan. Sandig sa JASIG, bilang konsultant sang NDFP indi dapat arestuhon si Velasco. Obligasyon sang rehimeng Arroyo nga gilayon siya nga ituhaw kag hilwayon.

Ginbaton sang United Nations Working Group on Enforced or Involuntary Disappearances (UN WGEID) ang ginpadala sang NDFP nga kopya sang sulat ni NDFP Chief Peace Negotiator Luis Jalandoni kay Gloria Arroyo nga mabaskog nga nagapamatuk sa pagkuot kay Velasco kag nagatumod kay Arroyo bilang pinaka-responsible nga upisyal sa pagkuot bangud sa iya pagka-commander-in-chief sang kabilugan nga armadong kusog sang gubyerno. Bilang sabat, nagpadala ang UN WGEID sang balayon nga dapat pun-an sang NDFP para masuguran na ang pag-imbestigang ni la sa kaso ni Velasco, amo man sa nagligad nga mga kaso sang pagkuot sa iban nga mga konsultant sang NDFP kag mga istap kag himata nila.

Suno sa PKP, nagapangulba ang mga himata kag abyan ni Velasco nga mapareho siya sa iban nga lider kag myembro sang PKP kag NDFP kag bisan sang mga lider kag myembro sang ligal nga demokrati-kong hublag nga gintortur kag



ginpatay. Nahibal-an sang PKP kag NDFP ang polisiya sang rehimeng US-Arroyo sang pagpanalbeyds sa mga nabihag sang AFP, labi na sa mga ginabilang nila nga upisyal sang PKP, NDFP kag BHB.

Sadtong nagligad nga tuig, napulo ka konsultant kag myembro sang NDFP ang ginkuot kag tubtub subong wala pa gihapon ginatuhaw sang AFP. Lakip diri ang magtiayon nga Prudencio Calubid kag Celia Palma, isa pa nila ka himata kag ang duha ka istap sang NDFP nga sadto upod nila; sanday Rogelio Calubad kag anak niya nga si Gabriel; ang istap sang NDFP nga si Leopoldo Ancheta; kag anay myembro sang BHB nga si Philip Limjoco. May mga nabaton nga report ang NDFP nga sila tanan gintortur kag sang ulihi ginpatay.

Nagapanawagan man ang PKP sa United Nations Committee on Human Rights, International Committee on the Red Cross, International Committee of the Red Crescent, mga organisasyon sang tawhanong-kinamatarung sa Pilipinas, mga institusyon sang simbahan kag iban pa nga mga pwersa nga nagatib-ong sang tawhanong-kinamatarung, kahilwayan sibil kag proseso pangkalinungan ng ipamilit sa rehimeng US-Arroyo nga gilayon ituhaw kag hilwayon si Velasco kag iban pa nga konsultant sang NDFP kag mga tinawo kag paryente nila nga lunsay ginkuot sang militar. **AB**

Ka Bel, sobra isa ka tuig na nga nakahunong

MASOBRA isa ka tuig na nga nakahunong si Anakpawis Rep. Crispin "Ka Bel" Beltran bangud sa himuhimo nga kaso nga imbolbado sa "plano nga destabilisasyon" batuk sa rehimeng Arroyo. Padayon nga nagapamalibad ang rehimeng Arroyo nga magpamati sa malapad nga lokal kag internasyunal nga panawagan nga hilwayon na si Ka Bel. Madamu man nga nabaton nga suporta si Ka Bel halin sa mga

mamalidha sa nagkalain-lain nga bahin sang kalibutan. Nagapabilin siya nga nakahunong sa Philippine Heart Center kon sa diin siya ginsaylo bangud sa iya altapresyon.

Gindakup si Ka Bel base sa isa ka mandamyento nga ginpagguwa sadtong 1985 angot sa kasong rebelyon. Bisan palyado ang nangin proseso kag maathag nga himuhimo nga mga kaso ang ginpasaka sa

iya kag sa sobra 40 pa nga indibidwal, padayon nga nagapamalibad ang korte nga imandu ang paghilway sa iya.

Ang kahimtangan ni Ka Bel ginsaysay sang iya asawa kay Prof. Philip Alston, UN Special Rapporteur. Sugod sang iya detensyon sa Philippine Heart Center, naglahug si Ka Bel nga mas sigurado pa siya nga magadaug liwat ang Anakpawis sangsa mahilway siya.

Mangingisda sa Bohol, ginainitan sang mga pulis

APAT ka insidente sang pagpangluthang sang mga pulis kag mga *sea warden* batuk sa mga imol nga mangingisda ang natabo halin Septyembre tubtub Disyembre 2006 sa mga banwa sang Carlos P. Garcia, Bien Unido kag Talibo sa Bohol, suno sa Pamalakaya.

Sadtong Disyembre 20, ginpaulanan sang bala sang nagapatrulya nga mga pulis sanday Jasper Cuizon, 15, Emiliano Cabag, Lester Cabag, 9, kag Armin Lopez, 16. Naigo si Cuizon sa hita kag tubtub subong indi pa siya makabangon. Antes ini, ginpangluthang sang mga *sea warden* ang mga mangingisda nga sanday Carlito Juntilla kag apat pa nga iba sadtong Disyembre 5 malapit sa Danajon Coral Reef Marine Park, Carlos P. Garcia. Sanday SP01 Cortes kag SP01 Aceron, mga elemento sang RMG 7, ang nagpangluthang.

Sadto naman nga Nobyembre 16 ginpangluthang sanday Richie Abenido, 12, kag Bolic Quisto sa nasambit man nga lugar. Antes ini, ginluthang sadtong Setyembre 16 si Andy Dalanon, 28, kag duha ka iban pa samtang nagapangisda malapit sa *fish sanctuary* sang Carlos P. Garcia. Si SP01 Leo Aumentado ang gintumod nila nga kriminal.

Ang mga biktima ginpangluthang bangud kuno sa ilegal nga pagpangisda sa mga reserbadong erya.

Mga sibilyang Moro, biktima sang kalakasan sang AFP



SANDAY Abdulhakim Abbilul, 14, estudyante sang Kasambuhan Village Elementary School sa Kasambuhan, Indanan, Sulu kag Sarrid Jumdail, 24, ang pinakaulihi nga mga biktima sang wala'y untat nga pagpangluthang sang mga suldado sang AFP sa mga sibilyang Moro sadtong Pebrero 19. Namatay si Abbilul samtang grabe nga napilasan si Jumdail. Mapauli na ang duha ka sibilyan sa Barangay Marang, Indanan sang luthangon sila sang mga nagaoperasyon nga Scout Rangers nga ila nasumalang sa Barangay Kasambuhan. Gintuyo nga takpan sang militar ang natabo paagi sa pag-anunsyo nga mga elemento sang Abu Sayyaf ang ila naluthang pero indi mahimutig ini sa mga paryente sang biktima.

Samtang, libu-libo nga mga sibilyan ang napilitan nga magbakwit halin sa pito ka barangay sang Midsayap, North Cotabato kag sa Barangay Kabuntalan sa kaiping nga prubinsya sang Shariff Kabunsuan sining Marso 5 kag 6 matapos palukpan sang AFP sang mga *howitzer* kag *mortar* ang ila mga komunidad sa paglagas sini sa Moro Islamic Liberation Front (MILF). Nag-ibwal ang inaway sa tunga sang mga tropa sang AFP kag mga myembro sang MILF bunga sang paglusob sang militar sa mga pusisyon sang MILF sa mga barangay sang Lumupog kag Kadigasan sa Midsayap. Siling ni Eid Kabalu, tagapamaba sang MILF, nagsulod sa lugar ang mga tropa sang 6th IB sadtong Marso 3 agud gwardyahan ang mga suldado sang US nga nagalunsar kuno sang *medical mission* diri. Pero matapos ang aktibidad wala na maghalin ang mga suldado kag ginsalakay na nila ang mga ginabasehan sang MILF.



Kumander sang RPA-ABB sa Iloilo, ginsilutan

ISA ka kumander sang bandido nga Revolutionary Proletarian Army-Alex Bongcayao Brigade (RPA-ABB) ang ginsilutan sang isa ka tim sang BHB sa idalum sang Napoleon Tumagtag Command sa Southern Panay sadtong Pebrero 15.

Ginkilala ang lider sang RPA-ABB nga si Jose Cabunagan alias "Arce" sang Barangay Bagacay, Tigbauan, Iloilo. Si Cabunagan amo ang ginakilala nga *provincial commander* sang RPA-ABB sa Iloilo kag imbolbado sa pila ka mga krimen batuk sa pumuluyo.

Ginagamit sang AFP kag PNP ang RPA-ABB bilang mga *death squad* nga pangunahon naghimo sang mga pangpulitika nga pagpamatay. Ang ila mga operasyon kabahin sang Oplan Bantay Laya I kag II nga ginabandera sang rehimenng Arroyo.

Partikular nga krimen ni Cabunagan ang pagpatay kay Antonio Camiring, isa ka upisyal sang barangay, sa Sityo Baclayan, Barangay Hamog. Imbolbado man si Cabunagan sa pagpatay sa pila ka katapu sang progresibong organisasyon kag mga mangunguma sa isla.

2 pulis ginlambatan sang BHB sa Bicol

DUHA ka upisyal sang Philippine National Police (PNP) ang ginsilutan sang Bag-ong Hangaway sang Banwa (BHB) sa separado nga operasyon sa Masbate kag Sorsogon sining una nga simana sang Marso.

Sa Sorsogon, ginsilutan sa Barangay Zone 1, Bulan si Cipriano Lachica bandang alas-5:30 sang hapon sadtong Marso 2. Si Lachica ang dan nga hepe sang pulisya sa banwa sang Magallanes kag *deputy police chief* sang Bulan antes siya magretiro sadtong 2006.

Sa Masbate, ginsilutan sa Barangay Lampuyang, Pio V. Corpuz si Sr. Supt. Alberto Montecalvo, hepe sang PNP sa nasambit nga banwa bandang alas-5 sang hapon sadtong Marso 1.

Nakuha kay Montecalvo ang isa ka pistola kag iban pa nga kagamitan.

Ginsilutan si Montecalvo bangud sa pagkaimbolbar niya sa mga ekstrahudisyal nga pagpamatay samtang si Lachica nangin ahente paniktik sang militar matapos siya magretiro.

2 suldado patay sa ambus sang BHB sa Davao

DUHA ka suldado sang 73rd Infantry Battalion ang napatay makaligad makig-engkwentro sa Bag-ong Hangaway sang Banwa (BHB) sadtong aga sang Pebrero 28 sa Baranagay Tagurano, Toril, Davao City.

Ginlambatan sang mga Pulang hangaway halin sa Front 15 ang isa ka yunit sang 73rd IB sa Toril. Napatay ang duha ka suldado sa unang bahin pa lamang sang engkwentro. Naglawig sang halos isa ka oras ang inaway.

Antes sini, isa ka suldado ang napatay kag apat pa nga tropa sang 67th IB ang napilasan makaligad nakaengkwentro nila ang mga Pulang hangaway sa Sityo Bandira, Barangay Caningag, Caraga, Davao Oriental sadtong Pebrero 27.

Interbensyon militar sang US, nagalapad

GINAHIMO nga kobrehan sang nagkalain-lain nga paagi sang interbensyon militar sang US ang RP-US 2007 Balikatan *military exercises* nga ginhiwat sa Sulu halin Pebrero 19 tuhtub Marso 4. Ginpasakupan ini sang 400 US Marines kag 1,500 tropa sang Philippine Army.

Isa ka gintingub nga tim halin sa militar sang US nga kabahin sang Fusion Piston nga natabuan nga nagentra man sa Balikatan ang nakigpulong sa mga upisyal sang PNP sa Region 12 sadtong Marso 1 agud talakayon ang pagbuligay kuno nila sa pagtapna sa pagpasulod sang iligal nga droga sa kadagatan sang Mindanao. Ginagamit sang US subong ang kontra-kampanya sa droga bilang tapalan agud makapalupad sang mga *unmanned surveillance vehicles* kag maggamit sang iban pa nga kagamitan paniktik sa erya. Sa amo sini nga paagi, mapadayon nila ang ila operasyon sarbeylans sa mga pwersa sang BHB sa Mindanao kag iban pa nga bahin sang pungsod.

Ginatago man sang Balikatan ang terorista nga kampanya sang US sa Sulu paagi sa kuno makatawo nga proyekto pareho sang pagtukod sang mga hulot-klasehan, klinika kag karsada kag paghatag sang serbisyo medikal sa 14 komunidad sang Moro sa Mindanao. Ginapabaskog man sini ang aspeto nga militar paagi sa pagpahugot sang koordinasyon sa tunga sang AFP kag US sa pag-atubang sa mga internal nga halambalanon. Ginsiling man ni Maj. Gen. Stephen Douglas Tom, *co-director* sang *exercise* nga indi magduha-duha ang mga tropang Amerikano nga magbato para kuno depensahan ang kaugalingon kon salakayon sila sang mga lokal kag dumuluong nga terorista.

NSCB, nagpagguwa sang sala nga estadistika

NAGPAGGUWA sining Marso ang National Statistical Coordination Board (NSCB) sang gubyerno sang mga peke nga estadistika bahin sa minimum nga bili sang kinahanglanon sang pamilya agud mabuhi sang disente. Ini para hatagan-rason ang ginapaabot nga pagbasura sang hagna nga layi bahin sa P125 dugang nga minimum ng sweldo kada adlaw.

Suno sa sala nga estadistika sang NSCB, nagaabot na subong sa P8,061 kada bulan ukon P266 kada adlaw ang kinahanglanon sang isa ka lima-katawong pamilya sa Metro Manila agud mabuhi sang disente. Baliskad ini sa estadistika man sang gubyerno nga nagasingling nga P445.53 na ang kinahanglanon sang isa ka anum-katawong pamilya sadtong 2001 agud mabuhi sang disente sa Metro Manila. Naglab-ot ini sa P695 sadtong 2006 kag nagaabot sa P750 subong nga 2007. Sa pihak nga bahin, nagaabot lamang sa P350 ang minimum nga sweldo kada adlaw sa Metro Manila subong.

Madumduman nga gin-aprubahan na sa Kongreso kag Senado ang hagna nga layi bahin sa P125 nga umento sa sweldo kada adlaw matapos ang anum ka tuig nga pagtinguha sang kahublagan pangabudlay nga isulong ini. Pero gin-atras ini sang Kongreso sining Enero 22 sa manabaw nga rason nga dapat himuon nga Enero 2007 imbes nga Oktubre 2006 ang epektibidad sini. Ang pag-atras sa hagna nga layi nagasanto sa kagustuhan sang Malacañang kag sang mga monopolyo kapitalista kag daku nga burgis kumprador nga mabaskog nga nagapamatuk sa anuman nga signipikanteng pagsaka sa sweldo.

Mga estudyante, nagrali batuk sa AFP

NAGRALI ang nagkalain-lain nga lider-estudyante sa atubang sang Philippine Normal University (PNU) sa Maynila sining Marso 5 agud pamatukan ang paglunsar sang AFP sang porum sa PNU nga pilit nagaangot sa mga militanteng organisasyon sang pamatan-on sa Partido Komunista sang Pilipinas kag Bag-ong Hangaway sang Banwa. Gintumod sang AFP sa porum ang Anakbayan, National Union of Students of the Philippines, League of Filipino Students, College Editors Guild of the Philippines kag Student Christian Movement of the Philippines bilang mga prente nga organisasyon kuno sang kahublagan komunista.

Ginpaatubang sang mga suldado sa porum ang isa nga nagpakilala nga "Ka Lina" nga kuno anay gerilya sang BHB kag myembro sang Anakbayan. Pero nagtindog halin sa mga nagapamati si Eleanor de Guzman, tagapangulo sang Anakbayan para hambalon nga indi niya kilala ang ginasiling nga "Ka Lina." Sa punto nga ini natublag na ang porum sang AFP kag wala na ini nakapadayon.

Antes ini nakuhaan naman sang bidyo sang mga estudyante sang Polytechnic University of the Philippines (PUP) ang porum nga ginhimo man sang AFP didto. Natublag man ang pagguwa sang AFP sang ipangin-wala sang mga lider-estudyante nga nagapamati ang mga pasibangud sang militar.

Senador Madrigal nag-apelar sa UN angot sa Anti-Terrorism Act

PORMAL nga ginhingyo ni Sen. Ana Consuelo "Jamby" Madrigal ang interbensyon sang United Nations angot sa pagpasar sang layi nga kontra-pumuluyo kag pasista nga Anti-Terrorism Law. Ang layi nga ini ginpirmahan ni Gloria Arroyo sadtong Marso 6.

Suno sa senador, pagagamiton lamang sang rehimeng US-Arroyo ang Anti-Terrorism Law nga subong ginahingalanan nga Human Security Act batuk sa pumuluyo. Gamit ang layi nga ini, mahimo magluntad ang sitwasyon nga daw napaidalum sa layi militar ang pungsod. Lakip sa pinakamalaut nga probisyon sang nasambit nga hagna amo ang *wiretapping*, *warrantless arrest*, pagkontrol sa *bank account* kag iban pa nga batuk sa mga suspetsado.

Ginpaabot man ni Senador Madrigal ang iya pagpamatuk sa nasambit nga layi kay UN Special Rapporteur Philip Alston sadtong diri sa pungsod ini. Magapadala man sang apela si Madrigal sa United Nations High Commissioner on Human Rights sa Geneva kag sa Special Rapporteur sini para sa proteksyon kag promosyon sang tawhanong-kinamatarung.

Madumduman nga isa si Madrigal sa mga senador (upod si Sen. Mar Roxas) nga nagboto batuk sa Anti-Terrorism Bill sa Senado.

Halin sa umpisa, batuk na si Senador Madrigal sa Anti-Terrorism Bill. Sadtong Oktubre 2006, ginpatawag niya ang International Parliamentarians Caucus on Human Rights in the Philippines agud hingyuon ang ila suporta sa pagbalabag sa sadto hagna pa lamang.

Personal man niya nga ginsugilanon ang mga obispo sang Catholic Bishops Conference of the Philippines kaangot sini.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon

Tuig XXXVIII Blg. 5

Marso 7, 2007

www.philippinerevolution.net*Editorial*

Hugot nga batuan ang mga pasista nga opensiba sang rehimeng Arroyo

Pilit nga ginatago ni Arroyo kag sang iya mga kriminal nga tinawo ang ila duguon nga kamot sa atubang sang malaparan nga pagkunderar sa sulod kag guwa sang pungsod sa mga ekstrahudisyal nga pagpamatay kag pagkuot sa mga aktibista kag iban pa nga nagabato sa iya rehimen. Sa pihak sini, samtang ginapanginwala sang militar nga sila ang ara sa likod sang pagpamatay, padayon naman nila ginahatagan-rason ang mga atake sa mga progresibo nga pwersa sa paliwat-liwat nga pagsiling nga sila mga “komunista” kag “kaaway sang estado.”

Labi pa gid subong nga ginapasasan ang pasistang nga pagpamigos kag paglatag sang pasista nga makinarya sang estado. Tuyo ni Arroyo nga tanan-nga-bahin nga lutuson ang mga demokratiko kag progresibong pwersa, tapnaon ang mga pagpamatuk kag papason ang tanan nga nagahangkat sa iya kagamhanan.


Sugod nga mabutang sa poder ang bogus, garuk kag mapiguson

nga rehimen, ginlarga na sini ang “todo-todo nga gera” batuk sa mga rebolusyonaryo kag progresibong pwersa. Ginlunsar sini sadtong 2001 ang Oplan Bantay Laya (OBL), isa ka plano nga “counter-insurgency” nga ginatampukan sang paglagas kag pagpatay sa mga lider kag myembro sang ligal nga demokratikong kahub-

lagan kag mga ginasuspetsahan nga nagasuporta sa rebolusyon. Sa atubang sang padayon gihapon nga pagbaskog sang rebolusyonaryong kahublagan kag pagpamatuk sa rehimen, labi sini nga ginpabangis ang bag-o nga bersyon sang OBL kag ginpasingki ang kampanya sang pangpulitika nga pagpamatay.

Ginkastigo sang Alston Mission ang rehimeng Arroyo sa pagbansag sini nga “kaaway sang estado” ang mga ligal nga progresibong pwersa, kag ginaangot ini sa nagakatabo nga pagpamatay sa mga aktibista. Sa pihak sini, padayon si Arroyo kag iya mga upisyal sa ila pagpangbansag.

Ang mga armadong tinawo sang AFP kag PNP ginpaidal sa pang-ideolohiya kag pangpulitika nga indoktrinasyon nga ginahimo sang mga puno nga pasista kag maestro nga kleriko-pasista sang Malacañang kag AFP. Ginadukdok sa utok sang mga suldado kag pulis nga wala sang kinalain ang mga armadong rebolusyonaryo kag mga di armadong ak-



**Mga tampok
sa isyu nga ini...**

**AFP ang ara sa likod
nga pagpamatay—
Melo, Alston** PAHINA 5

**Mga kadalag-an sang
kilusang kababaihan** PAHINA 8

**Ituhaw kag hilwayon
si Leo Velasco** PAHINA 10

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa *angbayan@yahoo.com*